

RIMORSU D'UN PICCIRIDDU PICCATURI

Si di mè Patri, nun'haju parlatu ?
nun pozzu diri, nun lu conuscivi ?
mi lu ricordu iò sempri malatu
na sò carizza nun l'ha ricivivi;
mischinu stava sempri allitticatu
nun si cuntava chiù cu chiddi vivi;
e ghiò nun mi ciàvia affiziunatu
e quannu morsi mancu lu chiangivi.

Vi pozzu sulamenti cunfirmari
chi mentri lu trasportu si facia,
chiddi chi ni virianu passari
ognunu a lu curteu si iungia;
tuttu Paceca u vinni accumpagnari
vitti ch'un c'era nuddu ch'un chiangia;
e chiangiu puru iò quannu ci penzu;
tutti na vuci, VICENZU VICENZU.

Quannu qualcunu poi mi dumannava
a quali discinnenza appartinia,
appena lu sò nomu pronunziava
sutta la botta chiangiri u viria,
qualcunu puru nmrazza mi pigghiava
un gran vasuni nfrunti mi mittia;
dicianu: parlannu tra niatri;
picciottu: haivi a viriri a tò Patri.

Ma iò nascivi tantu sfurtunatu
nun potti avillu mai stu grann'onuri
mi lu ricordu sempri allitticatu
chinu di suffirenze e di turturi;
pi lu distinu vili e scilliratu
addivintai puru un piccaturi;
e pregu sempri, chi stu gran piccatu
l'havissi pirdunatu du Signuri.

Sugnu diversu di ogni pirsuna ?
nun fazzu parti a la cristianità ?
pigghiassi la mè sorti, a sgaridduna
pirchè pi mia, sta disparità ?
quali rimorsu, stu cori mi runa
lu mè pinzeri l'haiu sempri ddà;
iò sulu, unn'appi aviri la furtuna
mancu na vota, chiamari PAPA'.

RIALTA'

Lu sceccu si conosci a lu ragghiari,
lu porcu si conosci a lu grugniri,
lu zoppu si conosci o caminari,
lu preti si conosci a lu vistiri,
la fausa munita a lu scangiari,
lu pisci puzzulenti ntra lu friri;
lu spertu si conosci a lu parlari
e l'omu fissa appena chi si viri.

RIALTA' BIS

Lu pazzu dici parulazzi streusi,
lu valurusu merita l'applausi,
si fannu fritti rugnunedda e meusi,
li stazzunara travagghianu scausi,
cù prega nchiesa, dicennu agnus deusi
la maggiuranza sù mistichi fausi;
e la cunnanna di cù cogghi ceusi;
macchiari la birritta, giacca e causi.

A PIPPINU DINARU CHI MI RIGALAU
LU SO' LIBRU « LASTIMI »

Sennu picciottu m'happi a cumprumettiri
pirchè suvirchiarì nun vosi agghiuttiri,
ma ora vecchiu, mi piaci riflettiri
quannu la genti mi vulissi sfuttiri,
pi li dulura, bisognavi smettiri
di travagghiari sempri a catafuttiri;
la şira nveci d'irimi a divertiri
m'afferru un libru e mi passa u strafuttiri.

Liggivi lu rumanzu di grusoì
e puru chiddu di la Tolomei;
chiddu c'havia chiù forza d'un voi
chi morsi nsemi di li filistei;
rumanzi beddi di l'antichi eroi
n'haiu liggiutu qualchi trentasei;
ma sulamenti li lastimi soi
mi ficiru scurdari chiddi mei.

LU BUFFUNI

Sempri cu lu visu risulenti
un cappiddazzu e la facci ncipriata,
nasciu pi fari ririri la genti,
ntiatru, nta na chiazza, o pi la strata,
s'havi na pena ncori un ci fà nenti
la pena nun si viri; cummigghiata;
e quannu sbuffa, e chiangi veramenti
lu populu la criri BUFFUNATA.

A LU ME' MAESTRU

Nun vi cririti chè pirchè mi vantù ?
ma mi l'addetta lu mè sintimentu,
ogni vota chi vaiu o campusantu
va visitu o maestro Beneventu;
ma mi vivognu di rumpiri nchiantu
e mi trattegnu li lagrimi a stentu;
poi mi dinocchiu e cù firi sincera
mi recidu pi iddu na preghiera.

E mentri chiangiu pregu lu Signuri
chi nun finissi mai di supplicari;
pirchè pi lu sò affettu e lu sò amuri
a stu maestru nun pozzu scurdari
e pregu a Gesù Cristu cù firvuri
ch'un postu bonu ciàvissi a sarvari;
disidirassi chi vinissi misu
a centru mprima fila Mparadisù ?

E pò faricci festa notti e ghiornu
e tutti l'angiuliddi chi ci sunnu
battennucci li manu tutti attornu
iucari tutti quanti a girutunnu;
siddu chi s'avvirassi stu mè sonnu
nun ci sarrissi chiuì un vagabunnu;
si chissu li cristiani fari u vonnu
sarissi la salvizza di lu Munnu.

LA ME' VITA

Quannu nascivi Munnazzu di guai
fu malirrittu di tutti li Dei,
haiu suffrutu e suffrirogghiu assai
si dura stu Governu di Jurei
a vint'un'anni fatti mi spusai
sù ghiunti ottu li figghioli mei;
dui di ncoddu nun li lassu mai
e supra li rinocchia latri sei.

LU CARRITTERI

Lu carritteri poviru mischinu
di la famigghia sta sempri luntanu
mpaia lu sò cavaddu lu matinu
armatu di ncirata e di pastranu
quannu a na casa ci passa vicinu
tuttu si baggiania cu zotta nmanu;
puru chi ntasca nun c'havi un carrinu
è sempri allegru, cuntenti e baggianu.

Passa la vita stratuna stratuna
lu iornu, notti, la sira e matina
ma lu carrettu cu li trantuluna
ci fracassa li cianchi e la carina,
ogni tantu canticchia na canzuna
ma quannu a la sò casa s'avvicina
l'armuzza a lu Diavulu si runa
pirchè nun pò accattari la farina.

SPIRANZA

Rifarda, disonesta, senza sennu
chi notti e ghiornu mi v'ha lusingannu
chi piaciri ci prova nun cumprennu
sfuttiri a mia, a me patri, a me nannu;
passa l'estati poi speru a lu nvernu
ma poi mi trovo chiù tintu ri tannu;
ma ntantu la mè vita sta finennu
e chiuru li mè occhi lastimiannu.

Rifarda, puzzulentj e traritura
m'annaca sempri senza annacalora
e ghiò sincirunazzu aspettu l'ura
spirannu ch'idda fussi di palora;
ma ntantu sugnu iuntu nsipultura
e quantu sugnu fissa speru ancora.

SCINARIU CUMMUVENTI

Un picciriddu un vecchju accumpagnava
lu vecchju a stentu mperi si riggia
puggiatu a dù vastuna caminava
lu picciriddu satava e curria,
cummosu lu mè cori li taliava
poi cu l'armi a l'occhi mi dicia:
pirchè nun scrivi sta scena sculpita
di l'arba e lu tramuntu di la vita.

FU NA SURPRISA

Na vota un celebrissimu Tinuri
lu chiù grossu du Munnu si criria
sintennusi lu megghiu cantaturi
lu capu mastro di la miludia,
ma na matina cu tantu stupuri
havi ri tannu chi nun si vavia
dissi ntra diddu: sugnu n'erruri
e scumpariu la sò fantasia.

Fu na matina versu l'arbicedda
passava canticchiannu un carritteri
li duci noti di na canzunedda
c'havia dedicatu a sò mughieri;
cu dd'armunia e ddà canzuna bedda
ristau mpalatu com'un cannileri.

FACITI COMU MIA

Iò e me mogghi semu dù pirsuni
ch'un semu amanti da nostra opunioni
cundiscinnemu nfacci a la raggiuni
sempri cu paruleddi saggi e boni,
nveci stari ncazzati nda na gnuni
avemu tutti rui la cumprinzioni;
un sguardu, na carizza e un gran vasuni
e risulvemu qualunqui quistioni.

L'ACQUA

St'acqua tantu biniritta
chi criau l'eternu Diu
chi di ncelu dditta, dditta
mentri scinni la taliu;
nn'anzi a porta misu additta
mi ni preu e m'arricriu;
certi voti, sull'onuri
biniricu lu Signuri.

Mi ruru; mi smiruddu la mè menti
e lu mè senza penza e ci ripenza
pirchè lu Patreternu onniputenti
cu tuttu lu sò amuri e la putenza
criau tutti sti granni surgenti
supra la terra sta ricchezza immenza ?
e la cristianità tanta incuscenti
ancora un ci havi sta ricunuscenza.

Siddu chj l'omu havissi la cuscenza
e d'ogni cosa ni pigghiassi nota,
iddu ci metti sirvizzu e simenza
mu cu l'assisti, finu a la ricota ?
l'havissi l'omu, tanta diligenza ?
puru ch'u senza si ci vota e svota ?
quannu l'acqua ncampagna s'addisia
certuni fannu sta gran fissaria.

Peppi, Franciscu, Cola, Roccu e Ciru
cu Carminu, Filippu e Salvaturi
vannu cugghiennu soldi pi lu Triru
nescinu mpinitenza lu Signuri
iò çririri minzogni nun mi firu
la Bibbia la leggiu tutti l'uri;
nveci lu Preti pigghia a tutti ngiru
si ni strafutti di l'agriculturi.

Sugnu diversu a tanti Pacicoti
pi mia l'acqua di celu è distillata
sia d'invernu o tempu di ricoti
puru si chiovi ncursu la nuttata;
scappu macari cu li scarpi ascioti
mettu a cartedda sutta a cannalata;
« a costu chi mi vagnu tanti voti
mi cogghiu l'acqua pi tutta l'annata ».